

Visoki predstavnik se sastao sa zamjenikom ministra vanjskih poslova Grčke Loverdosom

Visoki predstavnik Paddy Ashdown se u ponedjeljak u OHR-u sastao sa zamjenikom ministra vanjskih poslova Grčke Loverdosom koji boravi u posjeti Bosni i Hercegovini. Ministar Loverdos je obavijestio visokog predstavnika o paketu sveobuhvatne pomoći grčke vlade za Balkan i za BiH. Razlog njegovog boravka u Sarajevu je potpisivanje sporazuma o saradnji i pomoći sa bh. vlastima. Sporazum vrijedan 19,5 miliona Eura će biti usmjeren na razvoj infrastrukture i uključivaće, između ostalog, rekonstrukciju zgrade zajedničkih institucija u Sarajevu.

“Pozdravljamo inicijativu grčke Vlade naročito zato što posebno naglašava značaj izgradnje i jačanja državnih institucija i poboljšanja funkcioniranja BiH,” rekao je visoki predstavnik Ministru Loverdosu.

Visoki predstavnik je istakao kako činjenica da Grčka preuzima predsjedavanje EU 1. januara 2003. godine predstavlja značajnu priliku za rješavanje problema sa kojima je suočena jugoistočna Evropa, kao i priliku da se naglasi ekonomski potencijal BiH i cijele regije. “Grčka može doprinijeti nastojanjima da se posebno naglasi regionalna saradnja”, rekao je visoki predstavnik. “Grčka može iskoristiti predstojeće predsjedavanje kako bi unutar EU stavila veći akcenat na regionalni pristup. Grčka od svih zemalja u EU najbolje poznaje potencijal jugoistočne Evrope.”